

麟書
楊帝海山記
楊太真外傳
竊憤錄
謝小娥傳

求心錄
楊帝開河記
高力士傳
南爐紀聞錄

中山狼傳
楊帝迷樓記
裴伯先別傳
御製紀夢



高
力
士
傳

郭
湜
撰

中
華
書
局

高力士外傳

唐 太原郭 湜撰

高力士於太宗陵寢宮見小梳箱一。柞木梳一。黑角篋一。草根刷子一。歎曰。先帝首建義旗。新正皇極。十有餘載。方致昇平。隨身服用。惟留此物。將欲傳示孝孫。永存節儉。具以奏聞。上至陵日。山川雷隱。草木風生。陳千官朝見之儀。具九賓宗祀之禮。禮畢。俯伏流涕。若不自勝。須臾。聞鼓聲四振。雲霧朗清。萬歲之聲。豈惟於遠近一人之孝。固通於神明。不可得而稱也。至寢宮。問曰。所留示朕者何在。力士趨入。捧跪上。上跪奉肅敬。如不可勝。曰。夜光之珍。垂棘之璧。將以喻此。曾何足言。卽命史官書之典冊。二十三年後。上忽言曰。朕親主六合二十餘年。兩都往來。甚覺勞弊。欲久住關內。其可致焉。三問羣臣。卿士皆云。江淮漕運。轉輸極難。臣等愚蒙。未知爲計。上甚不悅。後李林甫用紫曜之謀。爰興變造。牛仙客取彭果之計。首建和糴。數年之中。甚覺寬貸。上因大同殿思神念道。左右無人。謂高公曰。朕自住關內。向欲十年。俗阜人安。中外無事。高止黃屋。吐故納新。軍國之謀。委以林甫。卿謂如何。高公頓首曰。臣自二十年已後。陛下頻賜臣酒。往往過度。便染風疾。言辭倒錯。進趨無恆。十年已來。不敢言事。陛下不遣鄙賤。言訪芻蕘。縱欲上陳。無裨聖造。然所聞所見。敢不竭誠。且林甫用變造之謀。仙客建和糴之策。足堪救弊。未可長行。恐變正倉。盡卽義倉。盡正義俱盡。國無旬月之畜。人懷饑饉之憂。和糴不停。卽四方之利。不出公門。天下之人。盡無私

蓄棄本。遂末其遠乎哉。但順動以時。不逾古制。征稅有典。自合恆規。則人不告勞。物無虛費。軍國之柄。未可假人。威權之聲。振於中外。得失之議。誰敢興言。伏惟陛下圖之上。乃言曰。卿十年已來。不多言事。今所敷奏。未會朕心。乃頓首曰。臣生於夷狄之國。長自升平之代。一承恩渥。三十餘年。嘗願粉骨碎身。以裨玄化。竭誠盡節。上答皇慈。頃緣風疾所侵。遂使言辭舛謬。今所陳黷。不稱天心。合當萬死。頓首頓首。上曰。朕與卿休戚共同。何須憂慮。命左右曰。卽置酒爲樂。無使懷憂。左右皆稱萬歲。從此硬住內宅。不接人事。及開元之末。天寶之初。陳希烈上玄元之尊。田同秀獻寶符之瑞。貴妃受寵。外戚承恩。羅吉張俞。興黨錮之獄。楊裴韋秀李。受無狀之誅。五六年間。道路以目。祿山之禍。自此興焉。至十年。上又言曰。朕年事漸高。心力有限。朝廷細務。委以宰臣。藩戎不勦。付之邊將。自然無事。日益寬閑。卿謂如何。高公曰。比在內宅。不知時議。近於閣門外。見諸道奏事人。說雲南頻有喪律。陛下何以禦之。北兵近甚精強。陛下何以制之。但以皇威遠震。聖澤傍流。足以吞食鯨鯢。翦滅封豕。諸餘纖介。曾何足云。臣恐久無備於不虞。卒有成於滋蔓。然後禁止。不亦難乎。上曰。卿之所疾。漸亦痊除。今日奏陳。雅符朕意。近小有疑慮。所以問卿。卿慎勿言。杜復泄露。應須方便。然可改張。高公頓首謝曰。以陛下至聖。微臣至愚。幸契天心。不勝欣慶。其後楊李爭權。競相傾奪。王邢不軌。成就誅夷。十二年冬。林甫云亡。國忠作相。先酬宿憾。林甫被塚棺之刑。寧俟後嗣。國忠播宣淫之恥。十三年秋。大雨晝夜六十日。陳希烈罷。韋見素持衡。上因左右無人。謂高公曰。自天寶十年之後。朕數有疑。果致天災。以殃萬姓。雖韋陳改轍。楊李殊塗。終未通朕懷。卿忽無言。何以爲意。高公

伏奏曰。開元二十年已前。宰臣授職。不敢失墜。邊將承恩。更相戮力。自陛下威權假於宰相。法令不行。災害備於歲時。陰陽失度。縱爲軫慮。難以獲□。臣不敢言。良有以也。上久而不答。十四年冬。安祿山作逆。起自范陽。私聚甲兵。假稱朝貢。囚李芝於真定。劫光嗣於太原。長驅兩河。將吞九鼎。叢爾戎羯。乘我不虞。國家久致昇平。不脩兵甲。卒徵烏合之衆。以禦必死之軍。遂使張介然喪律於陳留。封常清棄甲於汜水。東京已陷。西土猶寧。有詔斬封高於驛前。鎮哥舒於關上。交鋒縱鏑。向歷半年。斬將擐旗。不逾信宿。兵疲師老。衆潰親離。國忠促哥舒之軍。務令速進。火拔冀祿山之黨。更卻先投。烽火遍照於川原。羽書交馳於道路。西京於焉失守。萬姓及此騷然。十五載六月十二日。有詔移仗未央宮。十三日。有詔幸巴蜀。至延秋門外。上駐馬謂高公曰。卿往日之言。是今日之事。朕之曆數。尙亦有餘。不須憂懼。扈從至馬嵬山。百姓驚惶。六軍奮怒。國忠方進。咸卽誅夷。號國太真。一時連坐。肅宗滅隨。駕兵馬復至咸陽。未振軍容。師徒小卻。長驅卒乘。北至朔方。七日。萬人勸進。讓不獲已。乃卽皇帝位於靈武。八月。尊太上皇於成都。改元爲至德元年。成都宣赦。上皇謂高公曰。我兒嗣位。應天順人。改元至德。孝乎惟孝。卿之與朕。亦有何憂。高公伏奏曰。陛下躬親庶務。子育黔黎。四十餘年。天下無事。一朝兩京失守。萬姓流亡。西蜀朔方。皆爲警蹕之地。河南漢北。盡爲征戰之場。天下之臣。莫不增痛。陛下謂臣曰。卿之與朕。復何憂哉。臣未敢奉詔。臣聞主憂臣辱。主辱臣死。死辱之義。職臣之由。臣不孝不忠。尙存餘喘。親蒙曉諭。戰懼伏深。初上過利州。西臨蜀郡。往來表疏。道路相望。知兩京有尅復之期。兆人佇來蘇之慶。仍皇情未暢。臣下多虞。及出劍門。到巴蜀井邑。氣

候風雲與中國而頗殊。對偏方而增恨。應需屢從。皆同此心。賴節度使崔圓以忠懇至誠。恐皇恩軫慮。凡所進奉。不越時宜。應修殿宇。不勦人力。上爲之悅。左右皆稱萬歲。上曰。崔圓可謂大臣歟。卽日拜相。西南之俗。無不欣然。後崔相欲赴行在。未測聖情。上覺其憂懼。謂高公曰。朕觀崔圓器宇冲遠。理識弘通。比諸宰臣。無出其右。若得對見。必倍承恩。後果如上言。且蜀中風土有異。中原秋熱冬溫。晝晴夜雨。事之常也。及駕出劍門。到巴蜀。氣候都變。不異兩京。九月十九日。霜風振厲。朝見之時。皆有寒色。詔卽令着袍。至二十一日。百官盡衣袍立朝。不依舊式。每奏事人來往兩京。動靜無不盡知。二年正月。祿山爲子慶緒所殺。慶緒僞立兒謀逆計。主以嚴莊僞勅。僞書出於高尚。但置酒爲樂。餘無所圖。上謂高公曰。皇帝久在鳳翔。臣威大震。兇徒逆黨。卽應殄滅。高公伏奏曰。逆賊背天地之恩。恣豺狼之性。更相魚肉。其可久乎。九月。皇帝在鳳翔。元帥廣平王中書令郭子儀。驅百萬之熊羆。吞二京之蚊蚋。不逾旬月。收復兩都。慶緒北走於鄴。中王師續圍於城下。至乾元元年。慶緒爲逆賊史思明所殺。王師失利。再陷洛陽。李光弼作鎮於河陽。郭英乂次安於虢路。上元元年。爲子朝義所殺。至寶應元年。卻收洛陽。朝義奔走。不知所在。上皇謂高公曰。安史二逆賊。父子相次伏誅。豈非天地神明之所殛罰也。高公曰。皇帝聖化。變及無窮。陛下仁德。禍流萬葉。凡是兇醜。自合誅夷。不勝慶快之至。初至德二年十一月。詔迎太上皇於西蜀。十二月。至鳳翔。被賊臣李輔國詔外。隨駕甲仗。上皇曰。臨至王城。何用此物。悉令收付所由。欲至城。皇帝具儀仗出城迎候。二聖相見。泣涕久之。傾城道俗。一時忭舞。便於興慶宮安置。乾元元年冬。上皇幸溫泉宮。二十日。卻歸因此。

被賊臣李輔國陰謀不軌。欲令猜阻。更樹勳庸。移仗之端。莫不由此。輔國趨馳末品。小了纖人。一承榮附之恩。致位雲霄之上。聖上屬殘孽未殄。蒼生不安。負愆軍戎。冀清海內。不暇揀擇。左右屏棄。回邪。遂使輔國熒惑兩宮。至傷萬姓。恣行威福。不懼典刑。上元元年七月。太上皇移仗西內安置。高公竄謫巫州。皆輔國之計也。上皇在興慶宮。先留厩馬三百疋。欲移仗前一日。輔國矯詔索所留馬。惟留十疋。有司奏陳。上皇謂高公曰。常用輔國之謀。我兒不得終孝道。明早向北內。及曉至北內。皇帝使人起拜云。兩日來疹病不復親起拜。伏願且留喫飯。飯畢。又曰。伏願且歸南內。行欲至夾城。忽聞憂憂聲。上驚迴顧。見輔國領鐵騎數百人。便逼近御馬。輔國便持御馬。高公驚下。爭持曰。縱有他變。須存禮儀。何得驚御。輔國叱曰。老翁大不解事。且去。卽斬高公從者一人。高公卽攏御馬。直至西內安置。自辰及酉。然後老宮婢十數人將隨身衣服至。一時號泣。上皇止之。皆輔國矯詔之所爲也。聖上寧得知之乎。上皇謂高公曰。興慶是吾王地。吾頻讓與皇帝。皇帝仁孝不受。今雖爲輔國所制。正愜我本懷。進御人令撤肉。便處分尙食。明日已後。不須進肉食。每日上皇與高公親看掃除庭院。芟薙草木。或講經論議。轉變說話。雖不近文律。終冀悅聖情。經十餘日。高公患瘡。勅於功臣閣下避瘡。日晚。聞門外有人問。稱是啖庭瑤。云聖人喚阿翁。問曾見太上皇未。曰。見了。高公亦不敢辭。卽隨庭瑤至閣門外。日晚。見內養將一卷文書狀云。使看。略見少多。皆是罷職。卻被索將附奏云。臣合死已久。聖恩含忍。容至今日。所看事狀。並不曾聞。伏願得親辭聖顏。然後受戮。死亦無恨。明日有制。力士潛通逆黨。曲附兇徒。既懷梟獍之心。合就鯨鯢之戮。以其久侍帷幄。頗效勤

勞且捨殊死。可除名長流□州。九月三十日。至□州。隨身手力。不越十人。所餘衣糧。纔至數月。殷憂待罪。首尾三年。經一年。忽見本道觀察第五國珍。謫至夷州。與第五相飲。賦詩曰。煙燼眼落膜。瘴染面朱虞。謂同病曰。幸相猶如此。餘何以堪。左右聞之。皆爲揮涕。又於園中見薺菜。土人不解喫。便賦詩曰。兩京秤斤買。五溪無人採。夷夏雖有殊。氣味應不改。使拾之爲羹。甚美。或登山臨水。以永終日。至元年建辰月。有制流人一切放還。至建巳月。二聖昇遐。今上卽位。改元爲寶應。元年六月。□州二聖遺詔到。號天叩地。悲不自勝。制服持喪。禮過常度。每一號慟。數迴氣絕。晝夜無時。傷感行路。恨不得親奉陵寢。而使永隔幽明。哀毀旣深。哽咽成疾。七月發□山。至朗州。八月病漸亟。謂左右曰。吾年已七十九。可謂壽矣。官至開府儀同。可謂貴矣。旣貴且壽。死何恨焉。所恨者二聖昇遐。攀號不遑。孤魂旅櫬。飄泊何依。泣下霑襟。視之盡血。言畢。以寶應元年八月十八日。終於朗州開元寺之西院。遠近聞之。莫不傷歎。九月靈輜發朗州。十一月至襄州。有詔令復舊官爵。追贈廣州都督。喪事行李。一切官給。陪葬玄宗陵。高公所生母麥氏。卽隋將鐵杖曾孫。始與母別時。年十歲。母撫其首泣曰。與汝分別。再見無時。然汝胸上七黑子。他人云必貴。吾若不死。得重見。記取此言。汝常弄吾臂上雙金環。吾亦留看。待見汝伺之。慎勿忘卻。卽與決別。向三十年後。知母在瀟州。雖使人迎候。終不敢望見。及到。子母並不相識。母問曰。與汝別時。記語否。胸前有黑子。母曰。在否。卽解衣視之。母亦出金環示之。一時號泣。累日不止。上聞。登時召見。封越國夫人。便於養父母家。安置。十餘年後。卒葬東京原。燕公誌墓曰。驗七黑於子心。辨雙環於母臂。卽此事也。其妻東平呂氏。故歧州刺史。

玄悟之女。躬行婦道。有逾常禮。大理司直太原郭湜曰。李輔國。謬承恩寵。竊弄威權。蒙蔽聖聰。恣行兇滅。所持刑憲。皆涉回邪。卽有敬毛裴畢之流。起周代索丘之獄。旣無所措。難以圖存。使天下之心。自然搖動。但經推案。先沒家貨。不死則流。動逾千計。黔中道此一色尤多。則三故相。裴冕。張鎰。張鎬。第五琦是也。一大夫。賀蘭進明是也。六中丞。鄭叔清。楊灌。章利見。皇甫銳。張萬頃。毛若虛是也。七御史。李融。屈無易。孫昌胤。孫瑩。宋晦。嚴銳。畢曜是也。三員外。張渭。張之緒。李宜是也。一左丞。皇甫銑是也。一郡王。瑒是也。一開府。力士是也。遺評補博卿監司舍。將軍。列卿。州牧。縣宰已下。散在諸郡。不可盡紀。從至德至寶應。向二千人。及承恩放還十二三矣。嗟乎。淫刑以逞。誰得無罪。湜同病者。報以誌之。況與高公俱嬰譴累。每接言論。敢不書紳。豈謂懷輔弼之元勳。當休明之聖代。卒爲讒佞所惡。生死銜冤。悲夫。